

PRIMERA CARTA DEL APÓSTOL

SAN JUAN

El mensaje de vida

1 ¹⁻² Yucuač Jesucristo cū cāniere, cū cabairi wamere mūja queti buiogu mūjaare queti jou yu áa. Nemoona cānicōañupi Jesucristo cū Pacu mena. Cānicōa aninucuu aniri mani quenare cānicōa aninucupere cajou āmi. Dio ye quetire cabuio majuu aniri caejayupi ati yepapu. Ati yepapu ejari mani Pacu mena mani cānicōa aninucupere jā caī buiowī. Jā majuuna cū cabuioepere jā caapiwu. Cūre jā catujuwu. Jā mena cāmi. Caroaro cūre jā catuju maji majucōawu. To bairo cū mena cānana aniri cū cátajere jā catujuriquere, cū cabuioepe quenare mūjaare buiorā jā áa.

Dios es luz

³ Caroaro Dio mena jā ā, cū Macu Jesucristo mena to bairona caroaro jā ā. To bairi mūja quena jā mena caroaro Dio mena, cū Macu Jesucristo mena caroaro mūja cāniparore bairo irā buiorā jā áa jā catujuriquere, jā caapiriquere. ⁴ To bairi mūja cawariñuucōa aninucuparore bairo irā atiere mūjaare jā queti buiogarā.

⁵ Jesucristo jāre cū cabuioepe mūjaare buio nutuana jā áa. Ocōo bairo jā caī buiowī: Dio caroaū āmi. Caroorije mácū āmi. Cabujurijere bairona caroaū āmi. Canaitīarijere bairo baiquēemi Dio. ⁶ To bairi, “Dio mena caroaro mani ā,” caīrā anibana quena, caroorije mani cátinucuada Diore itorā mani ī. To bairo irā cariape macaje mani átiqúee. ⁷ To bairi Dio cū caboori wame maca ána caroaro Dio mena mani ā. Aperā mena quena caroaro mani ā. To bairo Dio cū caboori wame cána mani cāmata caroorije mani cátiere mani coje rebojanucumi Jesucristo, manire carí re yajibojaricu aniri.

⁸ “Caroorije mácū yu ā,” mani caīata mani majuuna itorā mani ī. Cariape mani tūgoōña majiquēe ti wamere mani caīata. ⁹ To bairi caroorije mani cátiere Diore mani cabuio peoro majirio peocoagumi. “Caroorije mūja cátajere nipetirijere yu rebojagu,” cū caīricarore bairona cariape majiriogumi. Ūgueri coje rericarore bairona caroorije mani cátiere átigumi. ¹⁰ “Camaja nipetirā caroorije cána āma,” mani caī queti buioyupi mani Pacu Dio. To bairi, “Caroorije yu átiqúee,” mani caīata, “Jocuna caīñupi Dio,” caīrāre bairo mani ā. To bairo irā cariape cū Wadariquere caapigaquēnare bairona mani ā.

Cristo, nuestro abogado

2¹Yü punaa riapere bairona müjaare yu tugooña. To bairi müjaare yu queti joo atiere. Caroorije müja cátiquetiparore bairo ñi atiere ucari müjaare yu queti joo. Caroorije mani cátibato quena Jesucristo cu Pacure manire jenibojami. Caroorije macu ami Jesu. To bairi, “Caroorije na cátajere na majirioya,” íboja majimi mani Pacu Diore. ²Jesucristo manire cu cabai yajibojarique jugori manire majiriobojami Dio caroorije mani cátiere. Mani jeto meere mani cátibojayupi Jesu. Ati yepa macana nipetiräre noo cüre cabooräre caroorije na cátiere Dio na cu camajirioparore bairo cájupi.

³Dio cu caboorore bairo cána mani cámeta, “Diore cu yu maji,” cariapena mani í maji. ⁴Nii Dio cu caboorijere átiqetibacu quena, “Diore camajii yu ã,” cañi maca caño paii ami. ⁵Dio cu caboorore bairo cána maca Diore caroaro majuu camairä äma. To bairi Dio cu caí buioriquere mani cápata cariapena, “Diore camairä já ä, cu mena caroarä já ä,” mani í maji. ⁶“Dio mena caroaro yu ã,” cañi ücu Dio cu caboori wamere cátinucupau ami, Jesu cu cátinucuricarore bairona.

El nuevo mandamiento

⁷Yu yarä, atiere ucari müjaare yu buio joo jica wame Dio manire cu carotiri wamere. Cawama rotiri wame me ä. Nemoopü Dio cu carotirica wame ä müjaare yu caqueti buiori wame. Mere müja camajiri wame ä. Tiere caapinucuricarä müja ä. ⁸To bairo ti wame nemoopüna caapi majiricarä müja cânibato quena ocöo bairo Jesu járe cu caí buioepa wamere müjaare yu queti buio: “Cawama wame müjaare yu áti roti,” já cañwí Jesu. “Ame maiña mujaa,” já cañwí. Cu majuuna aperäre camaii ami Jesu, manire cu cäni rotieparore bairona. Cajuoyepüna caame maiquëna, caroorä müja cânüpa müja quena. Canaitiaropü cána, dope bairo caroare cáti tujü majiquënare bairo müja cânüpa. Yucnacä caroare müja áti maji jugóricarä. To bairi caame mairä müja ä. Cabujuro cânare bairona müja ani jugóricarä.

⁹Nii, “Dio cu caboorijere yu átinucu,” íbacu quena aperäre tei, cañi jocaü ami. Caroorije cátinucuu ami. Canaitiaropü cácare bairona anicöami cu ücu. ¹⁰Apeí aperäre camaii maca cabujurore bairo cácu ami cu yeripü. Caroaro áami Dio cu caboorijere. Caroorije átiqetininucumi. ¹¹Aperäre catei maca rooro átinucumi. Canaitiaropü cáaaácu, “¿Noo aácu yu áa?” cañi tujü majiquëcüre bairona baimi cu yeripü. Caroare áti maji qetibacu caroorije jeto átinucumi.

¹²⁻¹⁴Nipetirä müjaare atiere yu queti joo. Jesucristo jugori caroorije müja cátajere camajirioyupi Dio. Cabucurä, müja quenare yu queti joo. Diore camajirä müja ä. Jesucristo nemoopüna cáni jugoricüre cáti nacubugorä müja ä. To bairi müjaare yu queti joo. Cawamarä müja quenare müjaare yu queti joo. Catugooña tutuarä müja ä. Dio Wadariquere müja yeripü müja tugooña anicöa. Sataná caroorije upau macare canetoricarä müja ä. Caroorije müjaare cu cáti rotirijere müja apiujaqetininucu. Müja quenare yu queti joo atiere ucari.

¹⁵⁻¹⁶Ati yepa macana Diore canucubugokuëna, “Na cabairijere bairo yu baiga,” í tugooñaqueticöaña. Na ye macaje quenare booqueticöaña. Caroorije na cátigari wamere, na cáti epepe seeto tugooñama. Apeye

unie to cānacā wame na catujurijere tujū ũgooma. Na majuuna, “Aperā netoro cāna jā ā,” ī tūgooñanucuma. To bairona ā ati yepa macana Diore canucubūgoquēna na ye macaje. Mani Pacu Dio cū carotirije me ā ti wamea. To bairi nare bairo anigaqueticōaña. Noa to bairona anigarā mani Pacu Diore camairā aniquēema. ¹⁷Ati yepa macana Diore canucubūgoquēna na majuuna na caboorije cāna yajigarāma na ye macaje menana. Dio cū caboorije cātinucurā maca to cānacā rāmū anicōa aninucugarāma Dio mena.

La verdad y la mentira

¹⁸Yū yarā, ati ũmurecoo petigaro bai. Petoacā ruja ati ũmurecoo capetiparo jugoye. “Anigumi jīcau Cristore catei majuū,” caīrije quetire mūja apinucuricārā mere. Capāarā āma cūre bairona Cristore cateerā. To bairo na cāniere tujurā, “Petoacā majuū ruja ati ũmurecoo capetiparo,” mani ī maji. ¹⁹Naa, Cristore cateerā mani mena macana cānibama. Cabero manire Cristore caapiujarāre mani cāaāweocoama. To bairi mani mena macana majuū, Cristore cāti nūcubugorā majuū aniquetanama. Mani mena macana majuū na cāmata mani mena anicōaboricarāma. To bairi mani Cristore caapiujarā manire na cāaāweoro tujurā, “Mani mena macana majuū, Cristore caapiujarā majuū aniquetanama,” mani ī maji.

²⁰Mūja maca Cristo cū Espiritu Santore cū cajooricārā mūja ā mūja quena. To bairi Cristo ye quetire cariape mūja maji. ²¹To bairi, “Cariape tūgooña majiquēema,” īquēcūna mūjaare yū queti joo. Cariape Cristo ye quetire catūgooña majirā mūja ā. “Cariape ā atie queti,” mūja ī maji. Ape wame maca caītori wamere apirā, “Ī jocarique ā ati wame,” mūja ī maji.

²²Caītorā maca, “Jesu Dio cū cajooricū me āmi, cū Macūna me āmi,” caīrā āma. Jesucristore cateerā āma to bairo caīrā. Mani Pacu Diore, cū Macū quenare apiujagaquēema. ²³Dio Macū Jesucristore caapiujagaquēna cū Pacu Dio quenare caapiujagaquēna āma. Cū Macūre caapiujarā mani cāmata Dio punaa mani ā.

²⁴To bairi nemoona Jesu ye quetire mūja caapiriquere apiujacōa aninucuña. Cū ye quetire nemoona mūja caapiriquere mūja caapiujacōa aninucuata Dio mena, cū Macū Jesucristo mena caroaro mūja anicōa aninucugarā. ²⁵To bairi wame jā caīwī Jesucristo Dio mena mani cānicōa aninucupe cū cajoopere. ²⁶Atiere mūjaare yū queti joo, mūjaare caītogarā na cāniere ī buioū. ²⁷Mūja quenare cū Espiritu Santore cajooyupi Jesucristo. To bairi cū Espiritu Santo mūja mena anicōari cariape mūjaare majionucumi cū majuuna. Cariape macaje, caītoquētiere caī buioū cū cāno aperā mūjaare camajioparāre mūja booquēna. To bairi mūjaare cū caī majioricarore bairona Jesucristo mena caroaro anicōa aninucuña.

²⁸Yū punaa riapere bairo cāna, ocōo bairo mūjaare yū ī buio tunu: Yucacā Jesucristo mena caroaro mūja cāniere bairo anicōaña, cū yere apiujacōari. To bairo mani cānicōamata wariñuurique mena cūre mani boca tujugarā cū catunu atī pau cānopu. Mani bobo tujūquetigarā. ²⁹“Jesucristo caroa jeto cācu āmi,” mūja ī maji. To bairi, “Nipetirā caroare cātinucurā Dio punaa āma,” īrica wame quenare mūja ī maji mūja quena.

Hijos de Dios

3 ¹Tugooñaña mani Pacu Dio seeto manire cu camairijere. Manire maii, “Yu punaa âma,” manire i núcubugomi. To bairo manire cu caïrore bairona cu punaa mani â. To bairi mani cabairije cutiere majiquêma aperâ ati yepa macana Diore camajiquêna maca. ²Yu yarâ, yu camairâ, ocôo bairo mûjaare yu i: Dio punaa mani anituga. Cu punaa anibana quena, “Ocôo bairo majuu â cabero mani cabaïpe,” mani i majiquêe mai. Ati wame jeto mani maji: Jesucristo cu caejaropu cu cabaurije cutiere mani tujugará. Cu cabaurije cutiere tujurâ cûre bairona mani anigarâ. ³Jesucristo caroorije mácu âmi. Mani quena cûre bairo mani cânipere mani tugooñanucu. To bairi rooro mani catugooñanucurijere wajoarâ mani âa.

⁴Caroorije átaje netoo núcarique â Dio cu carotirique caroa macare. To bairi camaja nipetirâ rooro cána Diore canetoo nucarâ âma. ⁵“Caroorije mani cátiere regu caejayupi Jesucristo ati yepapure,” mûja i majicôa mûja quena. Caroorije cátiñaquêcu majuu âmi cûa. ⁶To bairi camaja nipetirâ caroaro Jesucristo mena câninucurâ caroorije átiqetinucoma. Caroorije cátinucurâ cu mena macana me âma. Cûre camajiquêna âma. ⁷Yu punaa riapere bairo cána, mûjaare yu caï buiorijere tugooña majiña. Aperâ mûjaare na caïtoro na api núcubugoqueti majucôaña. Caroaro cátinucurâ maca caroarâ âma, Jesu caroa cu cânore bairona. ⁸Sataná maca nemoopuna caroorije cácu cânicôañupi. To bairi caroorije cátinucurâ cu yarâ âma. Sataná rooro cu cátajere rei acú ati yepapure caejayupi Jesucristo.

⁹Cu punaare cûre bairona na cáno na cájupi Dio. To bairo cu cáto maca caroorijere átiqetinucoma. Caroorije áticôa aninucu majiquêma, Dio punaa aniri. ¹⁰Dio punaare, Sataná yarâre ocôo bairo na mani tuju beje maji: Noa caroare cátinucucuêna, aperâre camaiquêna Dio punaa me âma.

Amémonos unos a otros

¹¹Caame maipe â caïrijere nemoopuna mûja apiricarâ. ¹²Tirumupu macacu Caín cawamecucure bairo aniqueticôaña. Cu baïre catei maca cânupu cûa. Sataná yau aniri cu baïre cu cajía rocacôañupu. Cu cabairije cutie caroorije cáno maca cu baïre cu cajíañupu Caín. Cu bai cu cabairije cutie maca caroa cânupe. To bairi cu tuju ugoobacu cu cajía rocacôañupu Caín cu bai Abere.

¹³To bairona ape paura ati yepa macana Diore caapiujaquêna caroa mûja cátinucurijere tuju ugoorâ mûja tuju tutiborâma mûja quenare, caroa mûja cáto tujurâ. Caín cu baïre tuju ugoobacu cu cáttore bairona mûja quenare átiborâma. To bairo mûjaare na catuju tituro tugooña acuaquêja. ¹⁴Aperâre na mani camaiata, “Dio punaa mani â,” mani i maji. Cajugoye Jesucristore majiquetibana mani caame maiquêjupa. Yucura cûre caapiujarâ aniri mani ame mainucu yua. Mani caame maiquêpata tirumupu mani cânatore bairona mani anicôaborâ. To bairi cayajicoaparâ mani anicôaborâ. Dio tupu cânicôa aninucuparâ mani aniquetiborâ. ¹⁵Jiari maja aperâre catujuteerâ anibana nare jiarâma. To bairi noa aperâre catujuteerâ jiari maja cõona rooro na âma. Cajiarâ Dio tupu cânicôa aninucuparâ me âma. Mûjaa tiere tugooñari nare bairo baiqueticôaña.

¹⁶Jesucristo manire mairi cu cabai yajibojaro tugooñari mani maji aperâre mairique majuu. To bairi mani quena aperâre mairâ mani cacatiri

rumuri cõo Cristore catugooña ɯjaparã mani â. To bairi mani quena aperãre átinemorã nare mani bai yajibojaborã nare seeto majuu mani camaiata. ¹⁷To bairi bopacooro cabairãre apeye nare mani cajooboqe uniere cugobana quena mani cajooquẽpata, “Dio yaɯ yu â, to bairi aperãre camaii yu â,” mani i majiquẽe. ¹⁸To bairi aperãre na átinemoquetibana quena, “Aperãre na yu mai,” caiquetiparã mani â. Cariapena nare mai majuucõari nare mani átinemogarã.

Confianza delante de Dios

¹⁹⁻²⁰Ape paɯra mani yeripɯ ocõo bairo mani tugooñaborã: “Carooɯ majuu yu âcɯ.” To bairo tugooñabana quena aperãre na mani camaiata, “Dio mena carooaro yu â,” cariape mani i maji. Cɯ punaa mani cãno maca mani yerire maji peocoami Dio. Mani yeripɯ mani caroorijere majirio majimi. ²¹⁻²²Mani yeripɯ, “Caroorije yu cátiẽ wapa â,” caĩ tugooñarã mani cãniquẽpata uwirique manona Diore mani jeni maji. Cɯ carotirijere, cɯ catujoorijere mani cáto mani cãjenirijere mani joogumi Dio. ²³Ocõo bairije â Dio cɯ carotirique: Cɯ Macɯ Jesucristore apiɯja rotimi. Apeye quena, Jesu jãre cɯ carotiricarore bairona manire ame mai rotimi Dio. ²⁴Dio cɯ carotiriquere mani cátinucuata carooaro cɯ mena mani anicõa. Cɯ quena mani mena anicõami. Cɯ Espiritu Santore manire cɯ cajooricu jugori mani maji mani mena cɯ cãniere.

El Espíritu de Dios y el espíritu que está contra el Cristo

4 ¹Yu yarã, aperã ocõo bairo caĩto teñarã âma: “Dio ye quetire cabuiou yu â, Dio cɯ cabuiou joo rotiricɯ yu â,” caĩto teñarã capãarã âma. To bairi muja tɯpɯ na caejaro na cabuiorije ɯcariapena Dio ye, Espiritu Santo mena to anibapari? na i majiña. Dio ye riapɯ caĩ buioquẽna na cãno tɯju majiri na apiɯjaqueticõaña. ²Cariape Dio ye queti majuu Espiritu Santo jugori cabuiorãre ocõo bairo na muja tɯju beje majigarã: “Jesucristo Dio cɯ cajooricu âmi, manire bairona camajocu rupau mena cabuiaricɯ âmi,” îma caĩtoquẽna maca. To bairo cariape caĩrãre caapi nɯcɯbɯgope â. ³To bairo cariape Jesucristo cɯ cãniere caĩ nɯcɯbɯgoquẽna maca Espiritu Santore cacɯgoquẽna âma naa. Dio cɯ cabuiou rotiricãrã me âma naa. Cristore catei majuu anigumi jĩcau,” caĩ buiori wamere muja apiricarã mere. Cũre bairona Cristore cateerã jĩcaarã ati yepapɯ anitugama, mere. Nana âma, “Dio ye quetire cabuiou yu â,” caĩtorã. ⁴To bairona ati yepapɯ caĩto teñarã Satanã yarã âma. Muja maca Dio yarã muja â muja quena. Satanã netoro catutuaɯ âmi Dio. To bairi cɯ Espiritu Santo muja mena cɯ cãno Satanã yarã caĩto pairãre na muja netoo nɯcañupa. Nare muja caapiquetinucunupa. ⁵Naa caĩto pairã ati yepa macana Diore caapiɯjaquẽna mena macana âma. To bairi Diore canɯcɯbɯgoquẽna ye macajere caroorije macare buionucuma camajare. To bairo na caĩ buioro ati yepa macana Diore caapiɯjaquẽna carooaro na apima. ⁶Mani maca Dio mena macana mani â. To bairi aperã Dio yarã mani cabuiorijere apinucuma. Dio yarã cãniquẽna maca manire apigaquẽma. To bairona mani tɯju beje maji cariapena Dio yere canɯcɯbɯgorãre, ɯtoriquere canɯcɯbɯgorãre. “Ati majana âma cariapena Dio yere canɯcɯbɯgorã,” mani i maji. “I maja maca âma ɯtoriquere caapi nɯcɯbɯgorã,” mani i tɯju beje maji nare.

Dios es amor

⁷⁻⁸ Dio camaii majuu āmi. To bairi mani quenare caame maipe ā. Noa una aperāre camairā Dio punaa āma. Diore camajirā āma. Noa aperāre camaiquēna maca Diore majiquēema. ⁹ Manire cū camai tugooñarijere iñoogu cū Macu jīcauna cācure ati yepapū cajooyupi. Cū mena mani cānicōa aninucuparore bairo īi cū cajooyupi cū Macure. ¹⁰ Nemoona cūre mani camaiquetaje to cānibato quena manire camaiñupi. Manire mairi cū Macure cajooyupi. To bairi cū Macu manire cū cabai yajibojarique jugori carooriye mani cātīe wapa majirioogu cū cajooyupi cū Macure. To bairo manire cū cātibojarique jugori mani maji yua ame mairique majuure.

¹¹ Yū yarā yū camairā, Dio manire cū camairicarore bairona mani quenare caame maipe ā. ¹² Jīcau mácana Diore catujuricu maami. Cūre catujquēna anibana quena aperāre mani camaiata mani maji mani mena cū cāniere. To bairi manire cū camairije jugori netobujaro aperāre na mani camairo áami Dio. ¹³ Cū Espíritu Santore mani cajooyupi Dio. To bairi mani maji manipure cū cāniere. Cū mena macana mani cānicōa anie quenare mani maji. ¹⁴ Jā majuuna jā catujuwu Dio Macure. To bairi atiere jā queti buionucu: Cūre cajooyupi Dio, ati yepa macana carooriye na cātīe wapa īi. Popiye na cabaibopere, caroora ya paupū na cāáabopere nare cū netoobojaato īi cajooyupi Dio cū Macure. ¹⁵ Noa, “Dio Macuna āmi Jesu,” cairā nipetirā caroaro Dio mena āma. Cū quena na mena anicōami Dio, “Cū Macuna āmi Jesu,” cairā mena.

¹⁶ Dio manire cū camairijere mani maji, “Mani maimi,” cairijere api nūcubugori. To bairi noa aperāre camairā caroaro Dio mena āma. Cū quena na mena anicōami. ¹⁷ Jesucristo quenare ati yepapū cū cāno cū mena cāñupi cū Pacu Dio. Jesucristo mena cū cānatore bairona mani mena āmi Dio mani quenare. To bairi mani quena Dio mena macana aniri cū camaiore bairo aperāre na mani mai maji. To bairi camajare cū cabejeri ramū cānopū mani cātajere mani boboquetigarā. ¹⁸ Caame mairā na cānopū uwirique maa. Mani caame maiata mani ame uwiquēe. Uwi tugooña bairique ā, jīca wame apeire rooro cūre mani cāto ībana. To bairi, “Mani cāti jugorique wapa mani popiyeyeboumi,” ībana cūre mani uwirā. To bairi apeī cūre mani cauiata cūre mani mai majiquēna.

¹⁹ Nemoona mani camai jugoyupi Dio. To bairi mani quena cūre mani mai. ²⁰ “Diore yū mai,” ībana quena aperāre mani catuju tutiata caīto pairā mani ānaa. Camaja mani catujuricarā na mani camaiquēpata Dio mani catujquetacu quenare mani mai majiquēna. ²¹ Ocōo bairo mani carotiwī Jesucristo: “Diore camairā aniri aperā quenare na maiña,” jā caīwī.

Nuestra victoria sobre el mundo

5 ¹ Camaja nipetirā, “Dio cū cajooricu, cū cabeje cūricuna āmi Jesu,” cai nūcubugorā Dio punaa āma. To bairi nipetirā mani Pacu Diore camairā cū punaa quenare camairā āma. ² Diore mani camaiata, cū carotiriquere mani cápata, “Aperāre cū punaare mani mai,” cariape mani ī maji. ³ Diore camairā mani cāmata cū carotiriquere cāna mani anigarā. Popiye tamuo tugooñarique me ā manire cū carotirique. Cāti majiña maniere rotiquēemi Dio. ⁴ Jesucristore api nūcubugorā mani áti maji Dio manire cū carotiriquere. To bairi ati yepa macana Diore caapi

nucubugoguēna caroorije na cātinucurijere mani netoo nūca maji. Dio punaa nipetirā caroorije átaje macare mani netoo nūcanucu. Ati yepa macana Dio punaa cāniquēna maca caroorije na cātinucurijere mani átiqeti ocabūtinucu, Diore caapi nucubugorā aniri. ⁵To bairi noa, “Dio Macu āmi Jesu,” caīrijere caapi nucubugorā caroorije macare canetoo nūcarā āma. Ati yepa macana Diore caapijaquēna maca caroorije na cátiere átiqetincuma Dio punaa.

El testimonio acerca del Hijo de Dios

⁶Jesucristo Dio Macu caejayupi ati yeparu. Ati yeparu cu cāno riapu cu cabautisawī Juan bautisari majocu. To bairi Jesu ocopu cañujāricu cu camaa nūcaro, “Ani yu Macu āmi,” caī wadayupu Dio umurecoopu cācu. ⁷Cabero ape pau tunu manire cu carīf re yajibojaparo jugoye to bairona cu caī wadawī Dio umurecoopu cācu. Ti paūripu Jesu Dio Macu cu cāniere caī buioyupi Dio. ⁸Jesucristo Dio Macu cu cāniere Espīritu Santo quena manipure ācu mani iñoomi. Cūna āmi Espīritu Santo cariape macajere cabuioy. To bairi itia wame Dio Macu Jesu cu cāniere buiorique cāñupa: Cu cabautisa rotirica pau Dio cu caī buiuro, manire cu carīf re yajibojaparo jugoye Dio cu caī buiuro, Dio Espīritu Santo mani mena cācu manire cu camajioro. Ti wamerena ī buiorica wame cāñupa Jesucristo Dio Macu cu cānie. ⁹Camaja na catujūrique na caī buioata quenare nare mani api nucubugo. To bairi Dio cu cabuioirije roquere netobujaro caapi nucubugope ā. Cariape cabuioyupi Dio Jesu cu Macu cu cāniere. ¹⁰⁻¹²Ocōo bairo mani caī buioyupi Dio: Cu Macu jugori cu mena mani cānicōa aninucupere mani cajooyupi Dio. To bairi noa cu Macu mena macana, cūre caapi nucubugorā to cānacā rumu anicōa aninucugarāma. Cu Macure caapi nucubugoguēna maca anicōa aninucuquetigarāma. Dio Macure mani canucubugoata mani yeripu, “Dio Macu āmi,” mani ī maji. Aperā maca tiere canucubugoguēna, “Caītoy āmi Dio,” caīrāre bairo āma.

Conclusión y consejos finales

¹³Dio Macure canucubugorā muja ā muja quena. To bairi atiere ucari mujaare yu queti buio joo, “Dio mena jā anicōa aninucugarā,” na ī majiato īi. ¹⁴“Dio cu caboorije uniēre cūre mani cajiēnata mani cajiēnirije apiimi,” mani ī maji. “Mani cajiēnirije apiimi,” caī yuurā aniri, “Caroaro mani átibojagumi,” mani ī maji. ¹⁵To bairi, “Noo caboorijere cūre mani cajiēni nucubugoro apiimi,” ī tugooñā majirā, “Cūre mani cajiēnirique quenare manire jootugami,” mani ī maji.

¹⁶Ape paura apeī Jesure canucubugoy anibacu quena rooro ācumi. To bairo rooro cu cāto tujurā Diore cu jenibojaya. Cūre mani cajiēnibojaro mani apigumi Dio. Cūre netoogumi cu cayajibopere. Ape pau maca jīcau rooro majuu áticoā aninucuri bai netoo nūca anicōacumi. To bairo cu cānicōaro, “Cu jenibojaya,” ī majiña maa. To bairo cabai netoo nūca anicōarā yajigarāma yua. ¹⁷Nipetiro caroorije átaje Diore netoo nūcarique ā. Caroorije mani cátaje cūre mani canetoo nūcarijere majirioogumi Dio. Apeye macare majirioquetigumi Dio cūre bai netoo nūca anicōa aninucurijere.

¹⁸Ocōo bairije mani maji: Dio punaare caroaro na cotenucumi Jesucristo. To bairi caroorije átiqetincuma Dio punaa. Dio Macu nare cu cacoterije jugori rooro na áti majiquēemi Sataná carooy majuu quena.

¹⁹“Dio punaa mani ă,” mani ĩ maji. Aperă ati yepa macana Diore caapiujaquēna maca nipetiră Sataná cū carotiră āma.

²⁰Dio Macū ati yeparū cū caejarique quenare mani maji. Caejayupi jīcauna cariape cācure Diore mani camajiparore bairo ĩi. To bairi Cristore apiujarā cū mena caroaro mani ă. Caroaro cū Cristo mena ānaa caroaro Dio mena mani anicōa. Diona āmi Jesucristo, cariape cācū majuu. Cānicōa aninucū aniri manire joomi mani cānicōa aninucupere.

²¹Yū punaa riapere bairona yū catūgooñarā mūja cāno apeye mūjaare yū buio tūjapa. Apeye camaja na cāti nūcūbugorije uniere Dio ye cāniqētiere nūcūbugoqueticōaña. Dio jetore cū nūcūbugoya.

To cōona ă.